

Barentsguovllu Risttalaš girkuid ráđi oktasaš čoahkkima oasseváldiid (BRGR) cealkámuš

Anár, Suopma
10.10.2018

Mii fertet dál dahkat buorádusa!

Min reivves Árkttalaš ráđi presidentii 2017 geasi BRGR bivddiimet Árkttalaš ráđi meannudit Árkttalaš guovllu stuorát árvvuin go dušše vejolaš energiijagáldun. Maŋŋel go parlameantagaskasaš panela dálkkádatrievdamiid birra (Inter-govermental Panel on Climate Change (IPCC)) almmuhii raporttas 2018 golggotmánu, lea min mielas vel čielgasit ahte máilbmi ferte geavahišgoahtit ráidnasit energiija ja min eallinvuohki ja birgejuvpmi ferte šaddat guoddilaš. Mii ipmirdit ahte dat gáibida garra mearrádusaid. Dan dihte mii bivdit ahte min politihkkarat fertejit dál dahkat mearrádusaid eaige vuordit.

BRGR muittuha min politihkkariid ahte buohkat, muhto erenoamážit Sámit ja eará álgoálbmogat geat ássat Árkttalaš guovllus, dál juo gillájit dálkkádatrievdamiid dihte. Dálkkádatrievdamat billistit sihke álgoálbmogiid vejolašvuodaid joatkit sin árbevirolaš eallinvugiin, ja billistit birgenlági sidjiide geat juo ellet geafivuodas, goikkádaga, dulvviid ja meara lohtaneami dihte globála lulliguovlluin; olbmot geain lea unnimus sivva dan dillái masa máilbmi dál lea ollen. Dál sii maid fertejit leat oassin gávdname guoddilaš čovdosiid buohkaide. Mii buohkat dárbašit doaivaga ja dáhtu rievdademiide.

Risttalažžan leat mii bassi álbmot geat eat leat gohččojuvvon dušše váldit vára, muhto maid buressivdnidit lpmila sivdnádusaid (1 Pet 2,9). Mii leat gohččojuvvon biehttalit jurddašeamis dušše midjiide alcceseamet ávkki, sihke ovttaskas olbmožin ja fitnodagaid, riikkaid ja riikkaidgaskasaš jođiheamis. Risttalašvuohka lea vuosttažettiin Jesus Kristusa oaffaruššan “máilmmi eallima dihte” (ortodoksa liturgijja). Seamma ládje fertet maid mii oaffaruššat min eallinvuogi ja materialisttalaš opmodaga boahttevaš buolvvaid dihte.

Sámit geat leat álgoálbmot dán guovllus Eurohpás ja geaid ovddasteaddjit leat oassin dán čoahkkimis, ellet lagas ja erenoamáš oktavuodas luondduin. Álgoálbmogiid oainnut, máhttu ja vásáhusat leat dehálaččat min oktasaš barggus duostut dálkkádatrievdamiid. Mis lea buohkain ollu oahppat dán jurddašeamis.

Bisma Olav Øygard
Davvi-Hålogalánda bismagoddi, Norga
Barentsguovllu Risttalaš girkuid ráđi jođiheaddji

*Barentsguovllu Risttalaš girkuid ráđi (BRGR) lea Ruošša, Norgga, Ruota ja Suoma
Lutheralaš ja Ortodoksa girkuid davimus bismagottiid ekumenalaš fierpmádat.*